



KENYATAAN MEDIA

PEMETERAIAN MEMORANDUM PERJANJIAN ANTARA PERTUBUHAN KESELAMATAN SOSIAL (PERKESO) DAN UNIVERSITI PENDIDIKAN SULTAN IDRIS (UPSI)

KUALA LUMPUR – Pertubuhan Keselamatan Sosial (PERKESO) dan Universiti Pendidikan Sultan Idris (UPSI) akan bekerjasama untuk membangunkan **Instrumen Penilaian Psikologi untuk mengukur tahap motivasi peserta Program Return to Work (RTW) PERKESO.**

Kedua belah pihak hari ini memeterai memorandum perjanjian untuk tujuan tersebut, di mana PERKESO diwakili oleh Ketua Eksekutif, Dato' Sri Dr. Mohammed Azman bin Dato' Aziz Mohammed dan UPSI oleh Prof Dato' Dr. Md Amin bin Md Taff, Timbalan Naib Canselor Hal Ehwal Pelajar dan Alumni (HEPA), yang menjalankan fungsi Naib Canselor.

Majlis menandatangani memorandum perjanjian diadakan secara maya dan mematuhi SOP yang telah ditetapkan oleh Majlis Keselamatan Negara.

Instrumen Penilaian Psikologi yang bakal dihasilkan ini akan memudahkan proses pengukuran, penentuan dan ketepatan tahap motivasi pekerja yang hilang upaya untuk bekerja semula.

Sejak Program RTW PERKESO diperkenalkan pada tahun 2007 sehingga kini, seramai 34,704 orang pencarum hilang upaya telah berjaya dibantu kembali ke alam pekerjaan setelah menjalani rawatan pemulihan. Walau bagaimanapun, sepanjang tempoh tersebut, sebanyak 8.36% atau 4,494 orang peserta yang dirujuk ke program RTW berada dalam tahap tidak bermotivasi untuk kembali semula bekerja.

Bagi menangani isu ini, satu panduan atau instrumen pengukuran minat dan motivasi untuk kembali bekerja perlu dihasilkan bagi kegunaan Pengurus Kes RTW. **Instrumen Penilaian Psikologi ini dijangka siap pada hujung tahun ini.**

“Adalah menjadi harapan saya, kolaborasi strategik melalui pendekatan kaunseling dan sokongan psikososial di antara UPSI dan PERKESO ini dapat merangsang semangat dan melonjakkan motivasi Orang Berinsurans PERKESO yang mengalami hilang upaya untuk kembali bekerja dengan sihat dari segi mental dan fizikal,” kata Dato’ Sri Dr. Mohammed Azman di majlis tersebut.

Beliau juga berkata PERKESO akan berkolaborasi dengan rakan strategik khususnya IPTA-IPTA di Malaysia bagi melaksanakan kajian-kajian atau penghasilan instrumen-instrumen yang diperlukan dalam menyampaikan perkhidmatan yang terbaik kepada pelanggan.

Sementara itu, Prof Dato’ Dr. Md Amin dalam ucapannya di majlis tersebut berkata projek yang dijangka tamat pada akhir Disember 2021 ini akan memberi nilai tambah kepada PERKESO dengan adanya instrumen untuk mengukur ketersediaan para pekerja yang mengalami kemalangan / orang berinsurans PERKESO untuk kembali bekerja.

“Secara spesifiknya, instrumen ini bakal mengukur tahap motivasi, kesihatan dan gaya hidup mereka yang berkaitan (hilang upaya). Di samping itu, sukacita dikongsikan pemilihan UPSI sebagai rakan kolaborasi adalah tepat dan sebagai Universiti No.1 Pendidikan di Malaysia, UPSI sentiasa komited untuk memastikan kelestarian ekosistem yang berkualiti untuk membangunkan potensi individu untuk memenuhi aspirasi Negara.,” katanya.

PERTUBUHAN KESELAMATAN SOSIAL (PERKESO)

9 MAC 2021

DISCLAIMER

PERKESO tidak akan bertanggungjawab atau bertanggung bagi apa-apa kerugian yang terbit dalam kontrak, tort atau sebaliknya atas penggunaan atau pendedahan apa-apa data oleh mana-mana pihak bagi tujuan Pakej Rangsangan Ekonomi PRIHATIN 2020 yang melibatkan PERKESO seperti Program Subsidi Upah, Program Pengekalan Pekerjaan dan Program Saringan Prihatin PERKESO atau program-program lain yang berkaitan dengannya dan tidak akan bertanggungjawab atau bertanggung sekiranya penggunaan atau pendedahan

apa-apa data oleh mana-mana pihak bagi tujuan tersebut dilakukan oleh mana-mana pihak yang tidak diberi kuasa secara bertulis oleh PERKESO. PERKESO memandang serius terhadap keselamatan data peribadi dan meminta semua pihak supaya mematuhi peruntukan undang-undang dan peraturan-peraturan yang berkait dengan perlindungan data peribadi.